



ГАЗЕТА 1931 ПО' АПРЕЛЬ ИРЫ' ЮКАД ВАТА ХАСАВАЮДИМДЕЙ ЯЛЯХАД ҢАДИБЕРҢА

СИ" ИВ ЯЛЯХАНА ҢОПОЙ" СЕРТАБИВА"

Мэбета вадава" ила' панан' етри' мэква"! НЯРЪЯНА НЭРМ



№ 15 (5237)
2025 по'
апрель иры'
12 яля
СУББОТА

Российская Федерация Ямало-Ненецкий автономный округ



Сидяңг: Р.Окотэтто' талтавы

Хо" саляхана

3

Сайнормы" иринана" тензебтембива"



Сидяңг: С.Пальчин' тавы

Тюку по' 1941-1945 по" ямбан' нэвы сайнормахад мале сиднет ю" по" хая". Тамальгана сайнормы" иринана" нэвдо' җаха"на ялмыдаць. Поңганана" нули" тянё". Ямална" җарка маркана җопойри ветеранва". Техэ" похо"на соявы" җацекеы" мале җармы" ненэця". Пудандо' едэй" яна" тер" илма" нерня' минре".

Таңок по" хэ"мяхад сяхаңгарт' хэбидя сайнормам' нисетыва" юрибю". Хусувэй по' ты" ниць иры' хасава юдимдей яля' сямяхат ненадо ялям' мәцетыва". Илма" таяд паңгады.

Тикы' хавна мэта пова" Россия яна" нермбэртя' ватовна Победа' яля' 80 по" няю' тидхалы. Ңадьбята тодо" тэнз" ненэця" яна" тиггэвна невхы илма" тензебтемба хуркари" сава серо минре". Ңэрм' тер" җани' ненадо серкана тара". «Арктическая эстафета Победы» акциям' сертавы". Ты пэрти" Союз' тер" нерня' тидхалембидо'. Ямал' нермбэртя сиддо' саву"мы, округна" есяхат нядавыда.

Тарем' ты" саполана иры' 17 яля' пиркана няръяна лабакм' минарта" Чукотка' няд нэдалэйдаць. Харто' явнандо' таславы" нэсыхы" нултаңгавандо'

пуд Якутия' няю' нэкалмэдо'. Танияна җыхы сайнорма' мальгана җэрм' тер" җани' нядаңгурмы". Ңобаңгуна 1944 похона «Турваургин» колхозхад халэ, җамзи, ханеда" хоба «Турваургинец» танк сертава' е"эмня ма"лавы".

Якутияхад няръяна лабакм' ты" нэхэ"на нэдалё Таймыр' няю' ханавэдо'. Попигай харад' тер" сиддо' ядабтамбавы". Пыдо' җани' яндо' тиггэвна ненадо лабакм' минарць нэдалёрмы".

Сие ниць иры' 5 яля' Дудинкахаана Ты пэрти" яляхана Ямал' терха" ми"мэдо'. Михаил Яр' Ты пэрти" Союз' нэвахана мэна ня"амвэда. Пыда тикы серто' нямна тарем' лаханавы: «Ңэрм' терҗэ техэ сайнорма' мальгана җарка таром' ха"аврамбиваць. Ханяҗына" сайнормы". Ңанина" мякдато' манзаяханато' сайнорта" нидо' нядабавы". Сиддо' тензебтембива". Сяхаңгарт' нина"

юраңгу". Теда' маня" Ямалан' няръяна лабакм' җани' тэврава". Антипаютахана, Новый Порт-хана, Яр-Салехана, Аксаркахаана нэдалё минартава"».

Маня" яна" тер" мале җахакуд Таймыр' няю' нэдалэйдаць. Мерета еся ханхана таяд тоць. Ямалханана" Победа' лабакм' минарць Тасу я' няна Яптик Алексей Синчувич' нэсыхыд Антипаюта' няю' нэдалавыд". Таяд Новый Порт, Яр-Сале', Аксарка' ёльцянд' тэваңгу". Хусувэй яхана тодо" ненэця" минреңгудо'. Пыдо' мал' хэбидя сайнормахана мэвы" иринадо' тензебтемба тарця серкана мэ". Тад пуда' няръяна лабакм' И.С. Шемановской' нюмам' мэта музейн' митадо'. Танияна нэңгу.

Хусувэй хардахана тохолкода" җацекеы" е"эмня Хэбидя" сайнорма' по вадета". «Северная кавалерия» нюбета ненэй иле"мям' җадимдембаңгу". Карельской фронт' няна җэрм' тер" ханзер' сайнормам', нядаңговам' таяд манэта".

«Арктическая эстафета»' сертамна книгама' пада тасламби". Мюнянда 1941-1945 похо"на сайнормы" Ямал' тер" нямна юне тола пиртава". Харто' яханато' манзаяханато' нидо' нядабавы" ненэцие җани' падаңгудо'.

Галина Окотэтто' падвы

Мал" нядаңгохова"

Җарка Победа' яля' това' нерцю" яна" тиггывна хуркари тарана серо җадимдембасеты". Ңопой тарцядо' «Красная гвоздика» нюбета акция. Нара' хусувэй по' сертабасетыдо'.

Тюку серм' сие" ниць иры' юдимдей яляхад пядонзь. Маңгты" иры' сидя ю" нябимдей яля' нэсонд' минреңгудо'. Яна" ханярина волонтерҗэ тарана" «Красная гвоздика» значок мирдапаңгу". Пуна ма"лавы" есдо'

Җарка Сайнорма нэва' мальгана ява" лэтрамбавы" ненэцяңг' митыдо'. Пыхыдадо' савумдамбавандо' няю', тарана җамгэдамдо' тэмда пир"мандо' няю' таславы" еся" нэңгу".

Хусувэй ненэць' ныхында пирувна нядаңго пир"җада. Акцияхана мэван' харвана" значокм' тэмдабто' серота. Ямалхана тамна җани" Россияна" яха"на тарана серм' җадимдеңгудо'. Пихина «Волонтеры Победы» манзарани, нядаңгоди манэпата" някундо' хан"җада".

Тарем' ниня җадядада таром' янда" тер" ед' ха"авра пиртада". Тарця ненадумда"маком' хэбидя яляхана сераира".

Небой по' округханана" сидя миллион' пир' есям' ненэцяңгат ма"лавыць. Тикэхэ"нато' пардон, лаха' серибтембада тибя, муно" сававна сова' е"эмня мэта аппарат, электрической коляска, тамна җани" җаво мэвыць.

Анна Яптик' падвы

Таром’ минреңгу”

Ява” лэтрамбада” ни”на” е”эмня тодо” марка”на, нюдяко хардахана хуркари нядангосэй сертаби”. Пыдо” нянандо’ етри’ хуркари” һамгэри” тара пэрңа”. Мядото’ хэвняна саць тоенана манзаям’ пэрңа”.

Тандая’ Салыңгардахад юкад вата сидя хуркари” тэнз” машина ма”лавыць. Харто’ манзаидо’ минрени” ненэця”, тодо” организацияхат һэда” няданговыць. Ханяңыдо’ мэтаесяхано’ ми”мыць. «Ямал - нюна” я!» тер” ненэй нито’ е”эмня һани’ тердехэя, машинам’ һэдаравыць. Нэвахана мэнадо’ Округана” Законодательной Собрания депутат – Эдуард Хабэчевич Яунгад тарем’ лаханасы:

–Тюкум’ хар”на” сулорпиваць. Терсавэй һэдараңгува”. Няха”нана” тараванда” һамгэри ма”лаваць. Нобнзер’ сайнорта” нина” нядабива”. Мякнато’ вуни” мы”. Хэвняна тоенана манзаям’ пэрңа”. Хусувэхэна нядангосэй” нянандо’ саць тара”.

Тикы’ хавна нядангодо” нобтики’ һэдарамбада” ханото’ мюй тараванда” һавэхэ”на тердевыдонзэ. Хасуй” һавар, серакабт, леной, тамна һани” һамгэ мэвыць. Тикыдо’ сайнорта” нина” няд”маңэ мэтыдо’.

Неноховавна школахана тохолкоди”, нюдяко” һацеке” падвы, падтавы падро, журнал, ханавыць.

Ненэй вадавна һэда «Няръяна Нэर्म» газетава” һани’ таниятэваңгу. Ява” лэтрамбадина” ханяңэхэна манэ”сартадо’, толабаңгудо’. Нэर्म яханандо’ нито’ ханзер” илевахад теневаңгу”.

Сие ниць иры’ нябимдей аляхана Си”ив харв харад’ няю’ ханэйдонзэ. Минрени” машиныдо’



серо ня”амбада” тара”. Еся хано” сулор”мад, дрон хомба мэта” һавэ тэмдаба нидо’ нядабавыць.

Тиканда Округхадна” ядембада яхана мэна” е”эмня хуркари” нядангосэй сертаби”.

Руфина Окотэтто’
падвы



Сидяңг”: Р.Окотэтто’ тадтавы

Явм’ мадаби”

Яляна” сэв’ һахана тую”уна хаясь. Яля’ иня лимбикавна пайдына” ни’ теберңа. Пивня ядэрп”, тэри сава. Ханя тарця һа”, мале сие ниць ирыңэ хая. Ханярина нэर्म’ тер” варңэм’ манэ”һаць. Тикахананда нараңэ хая. Та’ ёльцяңгана тэхэ”на мэна” ненэциена” һод” нобтики’ тэтнавандо’ паңоңэ хэсеты.

Хо’ Салы’ няю’ машинахана һэдалёб”нана” талбэй сехэры’ сидя ядувна ты” хадырцеты”. Теда’ Пэ’ тер” мюдадо’ пырдары’ сюрхалэйдо’. Тарем’ һо” ни” паромбю”. Нум’ ирива” ханзели” сюрхале пиртада. Ты” саполана иры’ пудана” аляха”на лаكري’ саць ядемясь. Харад” поңгы”

сыра” ноб” мальңгана мырыңэ хаяць. Ханяңы” ты’ пэрти” индэ’ һылмна яв’ тяха’ паромда” то”олхаць. Илева’ мюсерта” ненэцяңгав” хамедамбидо’, нерняна тамна сидя сыв иры’ танияһаха”. Сие ниць, ты” ниць ирыхына хуркари” тецьда” лада пирңадо’. Яв’ тяхана һод” мерри сырада ни холкаңгу”. Тамна сую’ хад” нобтики’ я”авласеты”. Сие ниць иры’ еркана Полуй’ яха’ няна (Пуд ёхан – хаби вадавна) сывандавы” нобтики’ нито’ ирмня пуны’ пняңгудо’. Тедари’ тамна таңга”. Харад” ядан’ тэв”махадандо’ сидя сян сехэры’ ядхана мэңгу”. Ненэця” һыхы ян’ хэвандо’ нерня тарана һамгэдамдо’ тэмдабаңгу”.

Нерденаңэ явм’ Иван Николаевич Окотэтто мадавэдасы. Пыда нобтики’ Полуй’ тяхана сырамда мадавэдасы. Техэ’ яхаданда сидя мюңэ сертавэдасы. Пыда вадада тарцясь:

–Хуняңы аля пунда яңгу, һадьбята мерарка явм’ мада тасламинзэ. Мань һопой мя”ми, мюсеб”, сяни” ненэцяңгат нидм’ пере”. Нарэй’ нэб”, ямб мюхуна ёльце сава. Тадңо” тюку илаңгана мюсеб”нана” тына” нива” мэс”, ханона” еся ханхана мюселембина”, тарем’ таныртари” тараңгу”. Ныхы ян’ мимб”, һани’ сава, хубта яда яңгу. Тэхэ”нана” мимы” нэб”на”, сидя мюхуна я’ пойм’ ниваць мадабаңгу”. Тедахав’

явм’ мада”махад таңгамдына”. Пудна” явм’ мадабада” тикариивна яңгода”. Суюндаңго ядва” һани’ лаха тасламбаңгува”. Ёльце сава нэбта тара. Неноховавна нядэй я серо”һа. Сяхаринда тарця һэсеты: явм’ мадаңгу” – несэй илам’ пнярахан’ нэңгун’. Нямгэ вэвамд тяхана хаеңгур”. Теда’ һод” һани’ мянувнана” таңгамдына”».

Тадри’ ты’ пэрти” мыры” нюрцю нито’ пуд яв’ тяха’ вэрналтыд”. Ёнар” тыдо’ һопой недан’ ха”маңгуд”. Ты” туро”, ханото’ ханзад” хэрна”, вэно” мад” һопой хумнаңэ ханта”.

Марина Ярой’
падвы



Сидяңг”: М. Яр’ тадтавы”

ХАКСАРКА

Хо" саяхана

Маркана сянакова' ялэ мэсо"махадана" Аксарка хардан' тэвынаць. Маня" нэрм' тернэ Ты пэрти" ялэ нули" натесетына". Хусувэй хибя нида ядабтаңгу, тарана нямгэдамда хоңгу.



Сидяңг. Марина Яр' тадтавы

ПОБЕДА' ЯЛЯ' ЕД'

Победа ялям' хахаялтем-ба нэрм' тер" нарка таром' ха"аврамбиць. Тикы' няю' пили" нюрте"э' нито' пуд вэрнана" хано манэ"лабтаць. Навхы" сайнороми" ёль-цяңгана ява" лэтрамбада" няхато' хуркари" нямгэри тэхэ"на тэволавыць. Теда' нани' ханото' мюня саць тарана" нэвэ, ты" хоба, нямзи, нэвар пэмбюрмыць.



Сидяңг. Руфина Окоэтто' тадтавы

МЭБЕТА" СЕБАР"

Пирдырмидо' ханзер" нэдимдембавам' нямгэри хардахана серо минрена" харто' тасламбидо'. Сянаковаха"на мал" ныхындо' пирувна варемдо' мэ"наць, няхато' маймбиць. Нюртейнэ ныхыдырта" пэйдаць. Пудандо' ямб санахана санарнаць. Нани' нопой тоенанадо' "хано санарпава. Ярколани, ламбаха"на сюрберти маниеваць. Тад пуна таротаха" сыржаваць.

Няхатата нерня' Василий Лаптандер ха"мыць. Пыда ламбита-вахана, хано санарпавахана, ямб санахана няхар" ненадумда"мам', нуданда тернэ есь ня"мась. Таротатахат нита нерняна Родион Лаптандер мэсь.



Сидяңг. А.Ткачев' тадтавы

МЕЛ"МАНА СЭДОРАНА"

Выңгана илена" нэрм' тер" ембдяродо' ся-харинда сава" нэсеты". Нэцекы", хасава", не" паныдо' манэ"лабтамбиць. Конкурсахана сямян-хат паскойдо' тэрабиць. Серо теневана" нули" сававна манэ"саръядонзь. Не" нюдо' вадарць падвы", мадавытана" паныдо', нюто' паны, мальци манэ"лабтамба янамбовна нерня' ядаць. Хусувэй" не" ембдяродо' харто' сэдырото' сер' сэдыбидо'.

НАВРАНА" НАВЫДОҢА"

Мале нябимдей по' Пэ" тер" сянакова' яляхана нямзам' ясыпа пирдырнэ". Тикан' ма"лэвы" ненэця", ясытана" нэокаць. Мал тарця нюрцянд' сырнаць. Хусувэдо' варемда мэ"нась. Нямзидо' хан' ни' нарка хыдя' мю' нонэйдонзь. Пуна сырманзь товы", мядонда" нэобкана нэворнаць.

Нямзам' ясыпавы ненэй не, Татьяна Лаптандер тарем' лаханась:

– Мань Белоярскхад нэадм'. Малесидя по' забой-кахана манзарасетыдм'. Си"ми сянэкованзь ха-наць. Тоенанада яңгу, нянани ненэлаць. Нюртей тарем' пирдырнэадм'. Нудани терад ня"мадамзь. Ихинани тэри мэвахарт сава.



Сидяңг. Руфина Окоэтто' тадтавы



Сидяңг. А.Ткачев' тадтавы

НЯВАТАЛАҢГУРТА"

Сямянхат нэтенадо' – тэхэ"на няваталаңгова. Пэвсюмя' ня-куна, пирдырмито' малэ"мяхад ненэця" мал' няваталаңгодаха" сырманзь ма"лыць. Яха' салаба' нимня хадридо' хатебтысь, Тюку по' нита нерня' Михаил Лаптандер ха"мыць. Тыда саць мере"мы". Пуданда Константин Лаптандер тэвыць. Вячеслав Лаптандер нэодь варкась.

Тарем' Пэ" тер" яхана нэопой мэвахана, сава хаер" нумгана сянэкова' ялям' мэ"наваць. Ненэцяңга"на нюрцямзь.

Руфина Окоэтто'
падвы



Сайнормы" ненэцие" мяд' тер пюрҗава"

Инзеледа"! Сайнорта" ненэцие порта" юнм' нэдарамби". 1941-1945 похона сайнормы" солдат" мяд' тер пюрҗа". Пыдо' фашистхат ямдо' нэдабавы". Маня" тюку яля' илевана" ед' ям' хэвхалмы". Юрна" ни" нэ". Маси" мядото' тер" нидо' тумдагудо'. Тики' е"эмня тюку" вади падыбина".

ВЫЛКИН
Ваулий Евдокимович



Ваулий Евдокимович Вылкин – военно-пересыльной падаркана ненэй ненэцэҗэ, Тюменяхана 1926 похона соявэҗэ пады. Тюменской ГВКхад сайнорманзэ ханавэдо'. ВЛКСМ'

тернэ таравы. Тет классм' малевы. Колхозхана манзаравы. Салыңгардахана мята тер" нида илевы". «Память Народа» сайтхана (URL:https://pamyat-naroda.ru/) Округна" ОВКахад нэдабтавэдо'.

1944 поход нэрка пэвдей иры' юкад вата матдомдей яляхад сайнормы. Салыңгарад' ГВК ханавэда. 1944 похона Красной армияхана мэвы. Нюмамда, еркарамда ня"мавы" ненадумда"мита падар" сер' падвыдо'.

26-й харта яхана нэда гвардейской тяжёлой танковой Ленинградской Краснознамённой полк' №01/н 20.01.1945г. табекосер' 26-й харта яхана нэда Гвардейской тяжёлой танковой Ленинградской Краснознамённой полк' рядовой тунитна «За отвагу» нубета медальм' ня"амвы. Польшахана (Республика Поль-

ша) Щецно нубета нудяко харадм' саюхат лэтрамбавандо' малыңгана Ваулий Евдокимович хасава ю" саюм' яңгумдавы.

Тики' пуд Гинденбург марадм' (едэй нюмда Забже, Польшахана нэ) гранатахана саю" станковой пулемётм' пендревы. Нята нита сехэрэд таңгумдавы. Малэ сян ялэ" тяхана №02/н сер 08.02.1945 г. табекосер' «За отвагу» нубета нэни' нэпой медальм' ня"амвы.

21 Армия 1 Украинской фронт' №0137/н 12.04.1945г. табекосер' Славы III степени орденхана ненадумдавэдо'. 26-й гвардейской харта яхана нэда саңговота танковой Ленинградской Краснознамённой Суворов' Орден' полкхана тунитнаҗэ таравы.

Нейсе маркана (теда' нюмда Ныса, Польшахана нэда мар") сайнормы". Ваулий Вылкин нэамгэхэртан' сейда нись пин"

нита нерня март' тэвавы". Тадди-кахад ю" саюм' яңгумдавы.

1945 похона ВС СССР Президиум' (19.02.1945 г.) табекосер' пыда полкханда Суворов' нюм' ед нэда III степени орденм' саң сававна серодо' сертабавандо' е"эмня, Пиотркув марадм' (Петроков, теда' Piotrków Trybunalski (польской вадавна) таңгумда"мандо' е"эмня ми"мы". Армияндо' нэвахана мэвы генерал-полковникм' Дмитрий Николаевич Гусевм' СССР' Верховной Совет' Президиум' табекосер' 1945 похона сие ницэ иры' матдомдей яляхана Советской Союз' Геройнэ нюмдевэдо'. Ленинм' нубета орденм' няби «Золотая Звезда» (№6092) медальм' ми"мы". Ваулий Евдокимович ненадумда"ми ня"мава" е"эмня пыда табекосер' падаркана пидте"мамда падтамбавы.

НОГО
Василий Тимофеевич



Василий Тимофеевич Ного – ненэй ненэцэ, нэвхы сайнорми" похона ява" лэтрамбавы.

Округна" военной комиссариат' падро" сер' пыда нямнанда тарем' пады: «Василий Тимофеевич Ного, енертаңэ таравы, 1926 похона Салыңгардахана соявы, ВЛКСМхана мэвы, Ямало-Ненецкий ОВК' табекосер' РККАн' сайнорманзэ 1944 похона ханавэдо'. Пудана" яляхана"на п/п 07173 «а» (31 харта яхана нэда моторостроительной ж/д батальонхана) мэвы, тэри ёховэҗэ толы. Небэда Ного Мавра Лаврентьевна, Салыңгардахана ул. Мирюгина, д. 13 мякана илевысь. Тики' падарканата тамна Николай

Тимофеевич Ного пады, некада нэдараха, 1944 похона яра' ирыхына тэри ёховы, нисяда –Тимофей Ного 1944 похона лимбэ' иры' сидя ю" сибимдей яляхана ядара яңгумы.

1944 похона ты" саполана иры' юкад вада сибимдей яляхад ВЛКСМ', РККА' ряд" тернэ таравы. 1945 похона ты" саполана иры' сидя ю" нябимдей яляхана Няхаромдэй Украинской фронтхана мэвы. 1944 похона ты" саполана иры' юкад вата сибимдей яляхана «Салехардской ГВК»' табекосер' («Солихортской» нэпой падаркана тарем' падвы) армиян' ханавэдо'. Еркарада, нюмда, пыда нямнанда нэда" нэни" тарана" вада" ненандумда"мита падро" сер' пады".

353 гвардейской стрелковой полк' №042/н ты" ницэ иры' нюртей яля' 1945 похона падвы табекосер' 114 гвардейской стрелковой дивизия' 2 Украина' няна нэвы фронт' 7 стрелковой рота', 3 стрелковой батальон' туним' мэта енертя гвардия' рядовой «За отвагу» нубета медальм' ня"амвы. 1945 похона ты" саполана иры' 28 яляхана лыңгарё яхам' мадавы. Таддикахад сеянда нись пин' тет саюм' ядавы. Тики' е"эмня ненадумдавэдо'.

Пыда полкхананда нэни' нэпой яна" тер мэвы. Тики' - Анатолий

Дмитриевич Попов. Пулемёт' енертаңэ таравы. Сайнорма' по" малыңгана ненадо нюмам' недвоми – полный кавалер ордена Славы.

114 гвардейской Краснознаменной стрелковой дивизия' № 029/н 1945 похона ты" ницэ иры' 15 яляхана нэдимдевы табекосер' 3 Украинской фронт' стрелок' 7 стрелковой рота' 3 стрелковой батальон' 353 гвардейской стрелковой полк' гвардия' рядовой В.Т. Ного Славы III степени орденм' ня"мавы. Пыда 1945 похона сие ницэ иры' 15 яляхана Дунай яха' няна сайнормандо' малыңгана Василий Тимофеевич Ного нюртейнэ яхам' мадавэда. Корносбург маркана сайнормы" (падарт' Корносбургнэ падвэдонзэ. Ненэйвана Нижняя Австрия нубета федеральной я' няңы Корнойбург марад нэвыкы). Таняна сидя мотоциклм' мэта саю" солдатм' ядавы.

39 гвардейской стрелковой Венской корпус' 9 гвардейской армия' №041/н 1945 похона маңгы" иры' 11 яляхана автоматчик нэванда е"эмня 7 стрелковой 3 стрелковой батальон' 353 гвардейской стрелковой полк' 114 гвардейской дивизия' гвардия' рядовой В. Т. Ного нябимдей «За отвагу» нубета медальм' ня"мавы. Штольберг нубета маркана (Германияхана)

сайнорма мимысь. Тикахана пыда сидя яңорэй' нэда харад' ни' танахая, самляңг ядна саюм' тунихина пирдалевы.

Тарем' тасла, тики' приказан' генерал-лейтенант Тихонов пидте"мамда нэбтавы. Михаил Фёдорович Тихонов сайнорма' по" пуд военной наука" кандитатнэ таравы, Советской Союз' Герой (29.06.1945г.), таддикахад няхар" Ленин' ед' сертавы" орденм' (29.06.1944г., 21.02.1945г., 29.06.1944г.), тет «Красного Знамени»' нубета" орден" (13.12.1942г., 30.01.1945г., 03.11.1944г., 20.06.1949 г.), Кутузов' ед нэда 1-й степень орденм' 28.04.1945г.), Суворов' ед нэда 2-й степень орденм' (21.02.1944г.), Отечественной сайноро"ма' ед нэда 1-й степень орденм' (25.10.1943 г.), сидя «Красная Звезда» нубета орденха' (22.02.1941 г., 28.10.1967г.), «Легион почёта» нюмам' мэта орденм' (США, 1945г.), «Заслуги Венгерской Народной Республики» нубета 1-й степень орденм' (ВНР, 10.03.1955г.), «Заслуги Венгерской Народной Республики» нубета 3-й степень орденм' (ВНР, 4.04.1955г.), «Красное Знамя» нубета орденм' (МНР, 1936г.), «Полярная звезда» нубета орденм' (МНР, 1938г.) ня"мавы.

Нарка я' юн <

Иланда – маймбабцо

Нарка сайнорма ваера"махад сиднтет ю" по" хая". Тадри' Победа' 80 пом' ядабтаңгува". Тамбир" нарка яля' нерцюна яханана" ханярина илена" ветеранха" медаль миши". Тюку ирий' нюртей толыркана Нельмин Салыхана илена, саю" по" мальгана манзаравы, ветеран – Мария Егоровна Лаптандер медальм' ня"мась. Тикамда е"эмнанда нарка ерв тэврадась.



хоб напа тухудамзь. Хадами ся-
мянд нерде' тарця манзаяха"
си"ми тохолась. Хой' не
сэдора, нумбьямда мэввна
ня"амба теневабта тара.
Ехэраб"нанда ханзер"
илеңгу? Хибя мята
тер сэдорпаңгуда?
Хусувэндо' сава емб-
дырода таниябто' тара"
ни"им". Тобак", пива",
либтад", мальця", хо-
бахад сэдвы" ея" хойхана саць
тарана". Тамна малковы нянд'
тоб", хамэдёда һавар" мале
таняб"нанда сава. Мякана һод"
сава, яля һэва" е"эмня, мяд'
мюй тавдамбада. Тикы" мал'
не' манзая".

По" ваерась, Мария ненэй
мел"мана сэдорана неңэ хая.
Ѓудиди мэта некоцям' төмбе-
кавна сэдвыта е"эмня янда тер"
саву"цетыдо'. Пыда илеванда
ямбан' сэдора, сэдораванда
поңгана сёкоцяда хайнасеты.
«Сём' мэпнанд ихина савараха
һэсеты, тикахана манзаяр һод"
сававна һадимда», - тарем' та-
салкосеты.

По" ваерась, сюдбьяко, ныхыта
некоця хусувэй теневамамда
не" нюхута тэврадась, пыда' ва-
товнанда теда' нюта ню", нюта
ню" ню" иле".

ПИЛКАБТЁДА" САЮ" ПО"

Сайнорма' похо"на хойхад
хасава" мал' хаяць, һацеки"
һарка" хибяри" тотрев' ман-
зараць. Хусувэй" манзаи не",
пухуця", вэсако", һацеки"
пэрьядонзь. Саңговотада һо-
кась, пилкабтысь, һаворман'
харвасетыва". Тарем' илеваць,
хибяхарт нисеты хусарку".
Сайнормам' мал' хамедамби-
ваць, теневаваць – сяхаңгава'
ваераңгу, һобкана мэсетыва".
Хусувэй серкана нина" няда-
басетына", манзаява" һокась.



Сидяңг: М.Яр' тадтавы

Тамальгы похо"на хойхана
сармик" һокаць, һоберцеты",
пи' ёльцяңгана мандалһэ то-
сеты", тына" сюрелембасеты".
Һацекеңэ сейна" пинсеты",
тына" нина" хаебасету", пи'
ямбан' ерамбасетына", ни-
сетыва" хоню". Вэнекова" тая-
сеты, сидна" нядабадава, нянда
енасетыва". Тарем' сайнормам'
мадаваць. Хоян' Победа' юн
тоб"нанда саць маймбываць,
ярһаваць. Тикы' пуд янамбовна
мякандо' сайнормы" хасава"
тоць. Ѓока ненэця" ниць ту",
сяңок һацеки" евакоңэ хаё-
вакы".

1949 похона
сайнормахад
Алексей Лап-
тандер мяканда
тэвыць. Мария
Егоровна Алек-
сей Иванович'
ня тюняди'
ваерась. Ѓока
по" хынёси"
илеңаханзь.

Си"ив нюмди' вадаһаханзь,
вэсакода Выучейской' нювм'
нубета колхозхана ты пэртяңэ
манзарась. Мария Егоровна
мата пэртеты.

Тенад' Нюдяхана Лаптандер'
мяд' тер" тыдо' хадырһа", общи-
нахана нюда, нюта ню" мэ".
Мария Егоровна сахарамбада
некоця, Салыхана харта мяк-
нанда иле. Сенз' һэя, пыда сита
нядабадида пили" хэвхананда
таняя".

Юлия Талеева' падвы

ВЫҢТЫ ИЛАНДА

Мария небымда нида тене",
пыда мер' яңгумысь. Не нюмда
нисяда Ноготысый Егор Мат-
веевич вадабидась. Хусувэй
вадамда тенад' тенеда. По"
ваерась, нисяда пили" ихинанда
мэ. Нисянда сава нядаңгодаңэ
хадада таравысь. Хэвхананда
мэна не һацеки" хусувэй серт'
тохоламбидась. Мария Егоров-
на вадамда хайна минреда:

–Мань мер' сэдорась, пени,



Сидяңг: М.Яр' тадтавы

ОБЪЯВЛЕНИЕ

**СЛУЖБА
ПО КОНТРАКТУ
В ВС РФ**

ПОЛНАЯ ИНФОРМАЦИЯ ПО ТЕЛЕФОНУ

8(902)81-6-11-90

ЗВОНОК ПО РОССИИ БЕСПЛАТНО

**ВРЕМЯ ДЛЯ
ВАЖНЫХ РЕШЕНИЙ!**

**КОНТРАКТНАЯ СЛУЖБА
6 200 000 Р
ЕДИНОВРЕМЕННАЯ ВЫПЛАТА
3 500 000 Р**

ПРИ ЗАКЛЮЧЕНИИ КОНТРАКТА НА ЯМЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 100 000 Р
ЕДИНОВРЕМЕННО ОТ РЕГИОНА

ДО 120 000 Р
СЕРТИФИКАТ НА РЕАБИЛИТАЦИЮ

400 000 Р
МИНИСТЕРСТВО ОБОРОНЫ

ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

**ЕЖЕМЕСЯЧНЫЕ ВЫПЛАТЫ
ПРИ НАХОЖДЕНИИ В ЗОНЕ СВО**

**РЯДОВОЙ
ОТ 210 Т.Р**

**СЕРЖАНТ
ОТ 232 Т.Р**

**ПРАПОРЩИК
ОТ 292 Т.Р**



Сидна” тенева”



Теда’ мале џоб” по’ «Вано» клубави” Санкт-Петербургхана тания. Тодо” яха”на тохолкодаңэ хусувэй си”ив яляхана ма”-люрјава”. Сава юнва” ханяримна со. Сидна” мале си”ив я’ тер” тенева”, џадьбьта тамна џацекы тохоламбунанзэ ядэрцетыва”.

Хэвы си”ив яляхана Арина Вануйтом’, клубм’ сертавы нява” Дудинкан’ хаңадонзэ. Таниянанда џоб” проективана џедалёрмысь. Пыда интернатхана илена” ненэй џацекы илна” нямна џеда видео сертаба тохоламбавы. Ханзер” падыбавамда, интернет’ мутравна манэ”лабтамбавамда, мал’ ваде”мыда. Едэй илаңгана тикы” мутра” ельце тарана” џамгэри”. Тарем’ ненэй ненэця” нямна илека” юн” ненэй’ вадавна џадиберта”, яна” тер” вадамдо’

намдортадо’, ханярина, нидо’ юрыбаңгу”. Ехэрана” џобтики теневабцодо’ џадимда”.

Тохоламбавы џацекыта нямна Арина лаханась:

– Мань тэри ини харвабцовна нидамзэ џедалёр”, си”ми таславы проективана хаңац. Тикы ватовна Дудинкахана тохолкода” џацекы видео сертаба тохоламба тарась. Интернатхана нюдяко хардахат тэврамбада” ненэй ненэця” ню” тохолку”. Нянани мэвыни” ю”,

ю” сидя потна” џацекэцэ. Мэкад џэвыцэ. Нюрте”э’ сейдо’ пинна” то”олхацэ. Вахала тикаривна я”мынась. Пуна џамгэ’ пират џобкана мэ”махадана” нина” торомдэйнацэ. Ханяңэхэна харто’ си”ми тидхалембицэ. Пыдо’ мутры мэцэ ёльце пирмэдо’. Ёбкана илна” нямна хуркари” мэкад” видео сертавацэ. Тикыни вадамбой’ џадимдембаңгун’. Хой’ тер” џацекэхэ”на мэ”махадани интернатхана илева нензел” нива

џэвам’ сававна хамедав. Пыдо’ ма”нисям”, џарво”махадандо’ Санкт-Петербурган’ тохолко тоб”нандо’ клубахана ядэрта”.

Ўоб” си”ив яля’ танияна мэ”махаданда џэрм’ тер” нита поңгана Арина идясацэ маямби. Клубанда тер” ядабтаб”нанда ваде”мандада џока џэңгу. Ёамгэри ненадо манзая нюдяко еңгахат пэңга.

Татьяна Сэрой’
падвы



Вадның дядям мэңаш”

Нешаң дил <

Ваднэм дям капи”, вахан-дя капи” кайвюча халакуңэ тондапитуң. Шиниңкуна ван-дхана чики халако’ нум кэхэ’ џаймай. Ни”, џашки’уди” лэпнэта. Тадям чуки дилихина кайвюча халаконтун’ маймаң мэты вадны дядям мэшту”. Чики дядяхана кайвюча халакуң дюнь дятындаш мячидёльш кяшту”. «Вадны тоңа – нума дюпа няң шатхалдай» – тадям понантоң маньштомай”.

Тадкаханавадны дядям дёдыше виляш мэңатоньш. Шанат тэмс нешади” культуран’ дет тондюта центрхана мансданна” кайвюча дядян хомана џанатамэт. Вадның дядян томы” хынилмаң, дюньшидемаң мэты вильта праздник’ шедтаңаш”. Дям капи”, вахан-дя капи” ванлат џычимчеңаш”. Кудкади” кынсу” мэңаш”, тадаңаш”. Шиниңкуна вадның Ёэдм’ дян тэйвап – ма-

дядштомэт. Кайвюча халакуң тэвма дюнь дятындаш дям капи”, вахан-дя капи” нятуң мятумана мячидёльш дятёдыштомай”. Кайвюча халаконтун’ маймаң

мэты каңудонташтомай”. Не-ңи” дюднуң, мед дюдкикана куй”кохо” дядяң мил тоода пэшку” няню” џытыштомай”. Тай”ня вадның дядяхана џашки’уде” майпё пия” помна пэшку няньтатуң шюдыштомай”. Кимя џука нянь џомтаңа – чике дилта, вяпта пон хома џайты. Тадям шиниңкуна џадка неша”

маньштомай”. Вадның пичат џашки’уде” шедташтомай”, поңкнатуң шана’коштомай”. Кукинтун’ нюңк’ џаймам, мэ-мямам’ конудпёш мянальштомай”. Вадны џайта” дютамаң мэты, џадка пуша” нитуң џупухут посами” куйкуң пахант камташтомай”. Четаң мэмытуң праздникхана шанкмян тэмс неша” џопт џомаш”. Вадның дядяң недья Талкаң чел” неша” вадның милас шедтапё мянадмай. Тальша конкурсхана мянадмы” тотун’ мячисы” няамңаш”.

Чики праздник’ џадтана” џашки’уди” хынилмаң мэт, шиниңкуй шеду”, дилм чедимямаң мэт шедташтутун’. Дям капи”, вахан-дя капи” дилхана тальша: недьчезэй томы вадны ламту пян џамтнай – мед нум дюпямты, пидьша пян џамтпата – мед ни’ дюпямт.

Андрей Пяк
патмы



Таттама”: А. Пяк таттамы”

Савако няби Вэвако



Сидяңг: М.Яр' тадтавы"

Ѓоб" не сидя хасава нюмдя няць илевы. Ѓаркаюм' нюдя пили" небянда табекохо" инзелевы, ҃арка" ненэция" мун" сер' нэвы. Нюмдя – Савако, сава илам' нёдаванда е"эмня тарем' нюмдевэдо'. Няхаданда нюдяюм' хасава ҃ацекеы хибяхартан' нивы намдор", тэри нэванда сер' илевы. Ненэция" Вэвакоңэ нюмдевэдо'. Ѓамгэхэртан' нись инзеле", табеко нись нёда тэри сэвта ед' иле. Пыда етри' тэри явна ядэр҃а, ҃амгэхэрт манзаям' мякнанда пэрман' ни харва". Небямда ҃амгэ тарцяковна Савакори нядабида.

Пэвсюмя' ёльцянд' Вэвако нямда етри' понкая тэри явна ядэласетыда. Таняна пыди' сянакурт҃аха', сюрберта҃аха'. Небяди' сидди' хамб", намдортади' яңгосаты.

Ѓоб҃гуна небяди' яңгода нюхуюда тёрсавэй ха҃аюда:

–Ябтов', та"ля' ҃ади', ханяна хаяди! Ненэция" мале хонэйд". Пэвсюмя, ханямна ядэр҃ади'!

Нюхуюда намдортади' яңгу. Тёняна мале нэсы' тер" ненэция" хонэйд". Тарем' тёрытаханда мякканда ҃авэдаана Савако то. Вэвако пунарка мале пи' ер҃э хэсь това-нонда. Янамбовна хонэй". Мале сянхав яля' тарем' ҃ацекехэ' иле҃аха'. Яля' талкада мяканди' тур҃аха'. Савако ханяңэхэна ҃амгэхэв тидм' манэцеты, пунда няна яднарха нэсеты. Сянхана тамна сенамда намдсеты. Небяханда тикыда ваде"ман' ҃ули" нида харва". Ѓоб" мэва' хасава ҃ацекехэ' ҃ани' пон' тэри явна ядэр҃аха'. Ѓамгэхэв сидди' таня' етри' хан-дараха. Савако ҃ани' сенам' намда, неранда няна яднархам' манэ"҃а. Тиканда сабе хамэдита яңгу. Сей-

да ҃ули" хая. Инда ҃ылмна талираңэ таслада. Мята няю' сюрамба хэван' харва, неранда няд ҃амгэхэв сидди' ёбтаба пя. Савако' нэда ян' таднадрев' хая", нерня' харва, ханзеркарт яхаданда тай' хэсь я"мада. Вэвако ҃об" тарем' нянда хэвхана ну. Вэвако' сэвхана ҃амгэхэв ненэция" пянидм' мэта сидди' мяти' няңы сехэрэхэд ёбтабадараха. Маниеб-та тикада ҃адцуй" паны мэтараха, сята хабя пунда яңгу. Сейти' хэсь ҃обт' тёреяха', хибяхарт сидди' намдорта яңгу. Пыди' мякданди' ҃ыхы яхана мэвэхэ'. Ѓопой яхана тэри ну҃аха'. Ѓобт' ярумаха'.

Ѓавэдаана Савако лакри' тад санаванда, нэда хон҃гара". Мята няю' сюрамба тарада. Вэвако яраць, тёрыць хаи, хибяхарт ситя намдортада яңгу. Тарем' мэна-



ханда тикы яхаданда ҃амгэхэв ситя илнарха. Вэвако ханямна хэвамда нида хамедамбю". Няби, Савако мякканда тэвы", сеянда хэ"мяхад тэри ледре. Ненэция" хонрамбидо', пыда ҃обкарт вадам' хэта я"ма, мунзипой" тэри ян' табекур҃а.

Небяда тум' пята, хэ" хан' мюд хэхэм' мят' тюле. Тикамда хы-номдабцо вадекая Савако нэва' ҃ыл' мэда. Савако хонарэй". Хуб-тахана юрка"махаданда нянда ханяна хаё"мам', ханзер" хэ"мямди' серото' сер" ваде"҃ада.

Ненэция" Савако' пумна тэри ян' хая". Тад тэввандо', ҃амгэ нэса! Вэваком' нюбета хасава ҃ацекеы хальмер' пэмбад' хэв-хана хабэйңэ юседа. Ѓэвамда пэмбад' сивна паклевэда. Мале ҃ахакуй халмер' пэмб" нэвы, ханяңы явнанда мардовы. Ѓэсы' тер" ненэция" Вэваком' таминдо' хальмер' хэван' сюр҃адо'.

Тадебя' лахарёхона тикы хальмераңэ мале ҃ахакуна ядэрта ҃ацекехэ" ня' сидяңгада лабцевы". Вэваком' нюбета хасава ҃ацекеы сидряңг ҃об" тарем' талираңэ ядэлавы". Хэвханди' нэсода ненэция" поңгад сянако нядамда талеванзэ ятнавы.

Тикы тальняю' хибяхарт сидя хальмераха' хэван' нивы нэсур",

талей нэванди' юн" мале сянди явна хэвы".

Ѓадьбято' ҃арка ненэция" манзеты": «Пэвсюмя' няна мяд' хэвнямна ядэрма вэ-ва, ервседа я яңгу, хальмер' сидряңг" ҃ыхы ян' тэвор҃а", нядамдо' пюрць пи' ямбан' ядэр҃а"».

Не Ѓадерой

Тю"уй сюранамэй
Янэй ха"молаңов,
Сядотако неңэй,
Неңэй Ѓадероей.

Сядопата нодэй
Сятов е"эмняңэй
Тетэй яңэй терэй"
Хамзанак неңэй.

Сядопата нодэй"
Тикы' хаванаңэй
Ѓуди мел' неңэй
Неңэй нюбе"҃анёв.

Ембадирта тарцёв.
Нумгад ха"амвией,
Икад тарпавией
Неңэй то"олханёв".

Ѓэвэй выдарамов,
Мирей тянюлемов,
Неңэй Ѓадероей
Юнетако неңэй

Тетэй сэрэй хабтэйм'
Подертари" ҃адэйм'
Маней манэзяванэй
Неңэйм' талеңгувэй.

Сёми хайна

Сидя ханзами
Ѓуркадарта ен'
Ен' то"олхаха'.
Нярьяна нойм'
Ялэмдад не
Марцькони ни'
Тондабадараха.
Сидя ханзами
Ѓэл' сырахана
Парандэйхана
Хынотархаха'.
Ѓэдалёбнани
Ханзад' сён'
Харни ини' сер'
Хынокосетыдм'.
Вы' яни серма
Сыра' сэр" хобам'
Танпасетыдм'.

Нара

Нум' ёрхана
Хаер" сюра,
Падухана лимбяка,
Сякна ядемби.
Вы' яна" нара
Тет' падвы
Хабто подермы.
Вы' ямда пэ҃а,
Сяни тэнз паны
Нара сэдвы.
Сыра холкана,
Ид' ензорта".
Вы' яна" нара
Саць ҃атенава"
Ѓэдалё тур҃а.
Нум' сармикэция"
Я' ханедако"
Сяни" муно"мана
Сялкабтыр҃анё".
Вы' яна" нара
Тет падвы"
Меретако" тыда,
Тыда подер҃анё.

Надежда Салиндер'
падвы"

Раиса Яптуңэ' падвы

Тю”уй сюрням’ ян’ ха”мола”



Яра’ иры’ 22 яляхана Саха (Якутия) республикаhana сядотэй” пирибтя” помнандо’ пирдырмам’ мэ”һаць. Нюм-да – «Цветок Ойкумены». Якутск хардан’ илебей” некоця” ма”лёвыць.

Ямалыхадана” тания’ Мария Окотэтто хан”һась. Ехэрана я’ тер” ненэй не-нэцие” ембдяро, ила’ саирм’ манэ”мы”. Конкурсахана яндо’ мыбцо һадимдембада” – си”ив пирибтясь.

Харто’ яндо’ паны, пиревы” һаврадо’, едэйвана сэдвы” имбытадодо’ манэ”лабтам-биць.

Пирдырмадо’ мале сян ян’ тярмы һэвысь. Нерде’ невхы паныдо’ мэць сцена’ нимня ядэсумбиць. Тикы’ пуд иландо’ нямна харе” вадавнато’ лаханакурһаць. Тад” пуна невхы” һаврато’ тэнзха”на жюрихина мэна нидо’ һавламбиць.

Мария пирдырмамда тарем’ ваде”һада:

–Мань сензелаваханани я’ евэйм’ пире-дамзь, тад тикахад пивынямюм’ маторһадамзь. Тикы’ хавна ханзер” евэйми пирембавами һани’ ваде”һавась. Тетимдей этап саць тоенар-кась. Тараваць, хыноһаваць. Мань ненэй сём’ мэ”һадамзь. Самлянзимдей этапхана едэйвана

таславы” панына” һадимдембиваць. Тикы” ембдирна” һамдэтарев’ сэдвы” һэбто’ тараць.

Конкурсахана Гран-при не-надумда”мам’ ня”амвы не – Аина Спиридонова, пыда Якутия’ тер. Нуданда тер-һэ 100 енарм’ терта сер-тификатм ня”амвы. Лада Суздалова’ ня”амвэда – 60 енар” еся. Акулина Стрижкова һоб”тарем’ танияһы яхад һэда 40 енар” есясавэй сертификатм’ недво”мы.

Мария Окотэтто Мисс По-лярная Орхидея номинациям’ ханавысь. Тиканда хав-на мядонзэйсипой” нивысь хань”. Республика Якутия’ һарка ерв’ һудахат ненэй ма-серм’ ня”амвысь. Тикамда пя’ ларас’ мюня Салехардан’ тэврадась.

Ямална” сядота пирибтя һэдалёромамда сававна тензебтембида:


–Ехэрана ям’ манэ”ма нянани ельце иле-кась. Ненэциедо’ һобтики сидна” тотрев’ харто’ вадамдо’ нерня’ минредо’, яндо’ тиң-гэвна тыдо’ вадаби”. Ты пэртито’ е”эмня сянакова’ ялядо’ һани’ таниявысь.

Мария Һокэй’
падвы

Региональное общественное движение и окружной Совет старейшин Ассоциации коренных малочисленных народов Севера Ямало-Ненецкого автономного округа «Ямал-потомкам!» выражает глубокое соболезнование Сэротэтто Татьяне Кузьминичне в связи с уходом из жизни мужа Виталия.

Светлая память о нем всегда останется в наших сердцах.
Скорбим вместе с вами.

Падтавы” хобцоко”



В

Я=Ө

ЛЭ




ЯБ




ВА



”
Н



”



Хобцоко”: Татьяна Сэротэтто’
сертавы”

Газета «Няръяна Нгэрм»	Главный редактор Яр Марина Тэтакучевна	ГЕНЕРАЛЬНЫЙ ДИРЕКТОР АНО «Ямал-Медиа» Зулинова Мария Андреевна	№ 15 Подписано в печать 10.04.2025г. Вышла в свет 12.04.2025 г. По графику: 16.00, фактически: 16.00.	ПОДПИСНЫЕ ИНДЕКСЫ: на год – ПА701, на полугодие – ПР562.
Учредитель – департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708).			Тираж 3600 экз. Заказ № 0446 (тираж 3600 экз.) отпечатан в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнунынца, д.1, каб. 106	Цена годовой подписки 166 руб. 84 коп.
Издатель – департамент внутренней политики ЯНАО (629008, ЯНАО, г. Салехард, пр-кт Молодёжи, д.9, каб.708)			Фактический адрес: 629007, Ямало-Ненецкий автономный округ, г. Салехард, ул. Чубынина, 39А	В розницу не распространяется.
Газета зарегистрирована – Управлением Федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО от 19 апреля 2012 года. Регистрационный ПИ № ТУ72 – 00559			Газета выходит по субботам.	Адрес редакции: 629003, ЯНАО, г.Салехард, мкр. Богдана Кнунынца, д1, каб. 106 тел. (349 22) 4-53-32 E-mail: nn@yamal-media.ru